

ვიდეომონიტორინგის განხორციელების წესი

დამტკიცებულია: წარმომადგენლობითი საბჭოს მიერ,
სხდომის ოქმი N2, დადგენილება N1, თარიღი: 06/02/2026წ.

მუხლი 1. რეგულირების სფერო

ვიდეომონიტორინგის განხორციელების წესი (შემდგომ - წესი), „პერსონალურ მონაცემთა დაცვის შესახებ“ საქართველოს კანონის (შემდგომ - კანონი) მე-4 მუხლით დადგენილი პრინციპების შესაბამისად, განსაზღვრავს სსიპ – საქართველოს შოთა რუსთაველის თეატრისა და კინოს სახელმწიფო უნივერსიტეტში (შემდგომ - უნივერსიტეტი) ვიდეომონიტორინგის მიზნებსა და მოცულობას, ხანგრძლივობას, ვიდეომონიტორინგის განხორციელების შედეგად მიღებული ვიდეოჩანაწერების (შემდგომ - ვიდეოჩანაწერი) შენახვის ვადას, ვიდეოჩანაწერებზე წვდომის, მათი შენახვისა და განადგურების წესსა და პირობებს, ასევე, მონაცემთა სუბიექტის უფლებების დაცვის მექანიზმებს.

მუხლი 2. ვიდეომონიტორინგის განხორციელების მიზნები

ვიდეომონიტორინგის განხორციელების მიზნებია:

- ა) დასაქმებული პირების, სტუდენტებისა და ვიზიტორთა უსაფრთხოების დაცვა;
- ბ) უნივერსიტეტის, დასაქმებულების, სტუდენტებისა და სხვა პირთა საკუთრების დაცვა.

მუხლი 3. ვიდეომონიტორინგის მოცულობა

1. ამ წესის მე-2 მუხლით განსაზღვრული მიზნებისთვის, ვიდეომონიტორინგი ხორციელდება ადმინისტრაციული შენობის შესასვლელებში, დერეფნებში, გარე პერიმეტრზე დამონტაჟებული ვიდეოთვალთვალის სისტემის მეშვეობით.
2. მონიტორინგის მიზნებისთვის, ვიდეოთვალთვალის სისტემის მეშვეობით აუდიომონიტორინგი (ხმის ჩაწერა) არ ხორციელდება.

მუხლი 4. ვიდეომონიტორინგის ხანგრძლივობა, ვიდეოჩანაწერების შენახვის ვადა და წაშლის წესი

1. უნივერსიტეტში ამ წესის მე-3 მუხლის პირველი და მე-2 პუნქტით განსაზღვრულ ადგილებში, ვიდეოსათვალთვალო სისტემის საშუალებით, უწყვეტად მიმდინარეობს სადღეღამისო (24 საათიანი) ვიდეომონიტორინგი.
2. ვიდეომონიტორინგის განხორციელების შედეგად მიღებული ვიდეოჩანაწერები ინახება ერთი თვის ვადით.
3. ამ მუხლის მე-2 პუნქტით განსაზღვრული ვადის ამოწურვისთანავე, ვიდეოჩანაწერი იშლება ავტომატურად, აღდგენის შესაძლებლობის გარეშე, თუ არ არსებობს მისი დაარქივების (შემდგომი შენახვის) საქართველოს კანონმდებლობით გათვალისწინებული მიზანი და საფუძველი.

მუხლი 5. ვიდეოჩანაწერებზე წვდომის უფლებამოსილება

ვიდეოჩანაწერებზე წვდომის უფლება, კომპეტენციის ფარგლებში, აქვს:

- ა) ინფორმაციული ტექნოლოგიების სპეციალისტს;
- ბ) პერსონალურ მონაცემთა დაცვის ოფიცერს (მხოლოდ ადგილზე გაცნობის უფლებით);
- გ) დაცვის სამსახურს.

მუხლი 6. ვიდეომონიტორინგის მართვაზე პასუხისმგებელი სტრუქტურული ერთეული

1. ვიდეოსათვალთვალის სისტემას მართავს უნივერსიტეტის ინფორმაციული ტექნოლოგიების სპეციალისტი.
2. ვიდეოჩანაწერების შენახვაზე, წაშლაზე, ვიდეომონიტორინგის პროცესში განხორციელებული ნებისმიერი მოქმედების აღრიცხვაზე, ვიდეომონიტორინგის პროცესში უსაფრთხოების წესების დაცვაზე და აუცილებლობის შემთხვევაში, ვიდეოჩანაწერების საქართველოს კანონმდებლობით გათვალისწინებული მიზნითა და საფუძველით დაარქივებაზე, მათ გაცემაზე, აგრეთვე ვიდეოჩანაწერებზე მესამე პირთა დაშვებაზე, პასუხისმგებელია ინფორმაციული ტექნოლოგიების სპეციალისტი.
3. ვიდეოჩანაწერები ინახება სპეციალურად გამოყოფილ, სათანადოდ დაცულ სასერვერო ოთახში განთავსებულ სერვერზე.

მუხლი 7. ვიდეომონიტორინგის განხორციელების პროცესში მონაცემთა სუბიექტის უფლებების დაცვის მექანიზმები

1. ვიდეომონიტორინგის განხორციელებისას, მონაცემთა სუბიექტის კანონით გათვალისწინებული უფლებები დაცულია.
2. მონაცემთა სუბიექტს ვიდეომონიტორინგის განხორციელებისას მისი უფლებების დაცვასთან დაკავშირებულ ნებისმიერ საკითხზე, უფლება აქვს შეუზღუდავად გამოიყენოს უფლების დაცვის როგორც უნივერსიტეტში არსებული ამ მუხლით გათვალისწინებული მექანიზმები, ასევე საქართველოს კანონმდებლობით გათვალისწინებული ყველა სხვა საშუალება.
3. მონაცემთა სუბიექტს გარანტირებული აქვს პერსონალურ მონაცემთა დაცვის ოფიცრის შეუზღუდავი ხელმისაწვდომობა - მას შეუძლია სამუშაო დროს მიმართოს მონაცემთა დაცვის ოფიცერს კონსულტაციისთვის და უნივერსიტეტში ვიდეომონიტორინგის განხორციელებასთან დაკავშირებით დამატებითი ინფორმაციის მიღების მიზნით.
4. მონაცემთა სუბიექტს უფლება აქვს როგორც წერილობით, ასევე ზეპირად, შეუზღუდავად მიმართოს (მათ შორის ანონიმურად) კანცლერს ვიდეომონიტორინგის განხორციელებისას მისი უფლებების სავარაუდო დარღვევის შესახებ და მოითხოვოს სათანადო რეაგირება. მონაცემთა სუბიექტს ასევე, შეუძლია, მისი უფლებების დასაცავად, დაუბრკოლებლად მიმართოს პერსონალურ მონაცემთა დაცვის სამსახურს ან სასამართლოს.
5. ვიდეომონიტორინგის თაობაზე უნივერსიტეტის იმ თანამშრომელთა წერილობითი ფორმით გაფრთხილება, რომელთა სამუშაო პროცესის/სივრცის ვიდეომონიტორინგიც ხორციელდება სავალდებულოა.
6. სტუდენტების, ვიზიტორების და ვიდეომონიტორინგის არეალში მოქცეული სხვა პირების ინფორმირება ვიდეომონიტორინგის მიმდინარეობის შესახებ, ამ წესის მე-8 მუხლით გათვალისწინებული გამაფრთხილებელი ნიშნებით ხორციელდება.

მუხლი 8. ვიდეომონიტორინგის მიმდინარეობის შესახებ გამაფრთხილებელი ნიშანი

1. უნივერსიტეტში თითოეული ვიდეოკამერის მიმდებარედ თვალსაჩინოდ განთავსებულია ვიდეომონიტორინგის მიმდინარეობის შესახებ გამაფრთხილებელი ნიშანი, რომლის წარწერის ზომა, ფერი და განთავსების ადგილი ქმნის მის მარტივად და აშკარად აღქმის შესაძლებლობას.

2. ამ მუხლის პირველი პუნქტით გათვალისწინებული მოთხოვნების დაცვის შემთხვევაში მონაცემთა სუბიექტი მის შესახებ მონაცემთა დამუშავების თაობაზე ინფორმირებულად მიიჩნევა.

3. 2024 წლის 1 მარტიდან განთავსებული გამაფრთხილებელი ნიშანი სავალდებულოა შეიცავდეს კანონით გათვალისწინებულ ინფორმაციას.